

BAB V

KACINDEKAN, IMPLIKASI, JEUNG RÉKOMÉNDASI

5.1 Kacindekan

Dumasar kana hasil panalungtikan ngeunaan toponimi di Kecamatan Conggéang Kabupatén Sumedang kapaluruh aya sababaraha hal nu kapaluruh. Dina data anu geus kapaluruh, katitén yén pola méré ngaran di Kecamatan Conggéang didominasi ku pola barung nyaéta aya 66% nu nunjukeun lembur diwangun ku dua atawa leuwih ngaran, sarta lembur di Kecamatan Conggéang nu diwangun ku hiji ngaran atawa pola liniér jumlahna aya 34%. Ilaharna pola ngaran barung dibéré gumantung kana kaayaan alam atawa kondisi sosial masarakat, ieu hal bisa ngagampangkeun masarakat sangkan hapol kana ngaran lemburna lantaran ngaran nu leuwih spesifik, contona Ciputat dibawa tina kaayaan alam deukeut jeung walungan atawa cai jeung disakulilingna loba tangkat putat. Sedengkeun pola liniér dibéré dumasar kana hal nu geus bener-bener nyampak tur nyumponan ciri gambaran hiji tempat.

Ngajanggélékna ngaran-ngaran lembur di Kecamatan Conggéang didominasi ku kondisi alam jaman harita, katitén aya 70% ngaran lembur nu dipangaruhan ku aspék fisikal nu diwangun ku unsur hidrologis, géomorfologis, biologis boh flora boh fauna, sedengkeun ngaran lembur nu dipangaruhan ku aspék non fisikal nyaéta 30% nu diwangun ku aspék sosial jeung aspék budaya masarakat Kecamatan Conggéang. Gedéna aspék fisikal nu ngawangun ngaran lembur di Kecamatan Conggéang lantaran dipangaruhan ku kaayaan sarta kondisi alam sabudeureunana jaman harita anu kacida beungharna *keanekaragaman* hayati boh flora fauna boh unsur hidrologisna, sarta Kecamatan Conggéang aya di daerah *dataran tinggi*.

Sacara sajarah atawa carita asal-usul ngaran lembur di Kecamatan Conggéang ngabogaan ciri has séwang-séwangan, saperti dumasar kana kaayaan alam, karajaan nu pernah ngadég, jeung kondisi sosial masarakat. Ditilik tina waktuna, ngaran lembur di Kecamatan Conggéang munculna di jaman Walanda saperti ngaran Conggéang, sarta ngaran Narimbang dina jaman karajaan harita. Lian ti éta, ilharana ngaran lembur di Kecamatan Conggéang dicokot tina kaayaan alam.

Harti kecap antara dina kamus jeung nurutkeun harti ti narasumber atawa asal-usul eta ngaran sok béda, ieu hal luyu jeung ciri-ciri foklor.

5.2 Implikasi

Hasil tina ieu panalungtikan nyaéta ngeunaan Toponimi nu aya di Kecamatan Conggéang Kabupatén Sumedang sangka bisa méré informasi katut pangaweruh pikeun masarakat husuna masarakat anu aya di Kecamatan Conggéang, kitu ogé pikeun panalungtik. Lian ti mangrupa sumber pangaweruh, ieu panalungtikan bisa jadi invéntaris pikeun pamaréntah ngeunaan toponimi di Kecamatan Conggéang. Ieu panalungtikan bisa jadi tatapakan atawa sumber pikeun balaréa dina nalungtik ngeunaan toponimi.

5.3 Rékoméndasi

Dumasar kana panalungtikan anu geus dilakukeun, aya sawatara rékoméndasi nya éta:

1. Pikeun panalungtik, nu bakal ngalakukeun panalungtikan medar ngeunaan toponimi, dipiharep bisa ngalakukeun panalungtikan toponimi nu can aya saméméhna sarta dipiharep aya nu nalungtik leuwih nyosok jero deui ngeunaan toponimi Kabupatén Sumedang.
2. Pikeun masarakat, dipiharep teu pareumeun obor ngeunaan asal-muasal hiji ngaran patempanan sarta bisa maluruh kana sajarah atawa asal-usul ngaran tempat anu dicicinganana. Para sesepuh dipiharep bisa nurunkeun carita sajarah atawa asal-usul ngaran tempatna sangkan generasi satulunya teu pareumeun obor sarta bisa jadi warisan turun-tumurun. Kitu ogé ka para nonoman sangkan bisa apal tur jembar pangaweruh kana sajarah atawa asal-usul ngaran tempatna.
3. Pikeun pamaréntah, hususna Dinas Pariwisata dan Kebudayaan Kabupatén Sumedang sangkan ngarojong kana ayana panalungtikan budaya salah sahijina panalungtikan ngeunaan toponimi, sarta ngabogaan invéntarisir data sajarah. Lian ti éta bisa méré pangaweruh ka masarakat ngeunaan sajarah tempatna séwang-séwangan.